

'AZUL' TA UN EXPERIENCIA TOTAL DI BONEIRO

AKI DESAROYO TA DEN BALANCE COMPLETO CU MEDIO AMBIENTE

Tin mucho mas cu ta conecta Boneiro cu Aruba, cu djis e añoranza di e isla cu nos tabatin prome cu e explosion economico. 'Azul,' e proyecto multi milionario di e comerciante Anthony Blok ta un coneccion mas entre e dos islanan ruman. Y tabata na fin di 2007, cu Anthony, Lisa y Anton Blok, hunto cu Sra. Edwina 'Wina' Blok a celebra e comienzo di realizacion di e soño grandi aki, hunto cu famia y amigo tanto di Aruba como Boneiro.

E celebracion pa marca inicio di construcion di 'Azul' a cuminsa cu un buelo di Tiarra Air di Aruba pa Boneiro, pa asina hiba un delegacion intimo encabeza pa Anthony Blok pa e isla ruman, no unicamente pa conoce e proyecto mes pero mas importante pa sinti local e ta experiencia cada biaha cu e ta bay Boneiro. Pasobra 'Azul' ta mas cu djis un proyecto di luho, e ta un oportunidad pa experiencia kico Boneiro ta, un pais trankilo, cu naturaleza impecable y hendenan cariñoso cla pa yama nan rumannan di Aruba bon bini.

Despues di a haya un bon bini cu un botter di awa 'Azul' (elabora pa Tropical Bottling Company di Aruba), e grupo di Aruba a subi bus pa recore Boneiro. Pa Anthony, e tour aki tabata necesario pa laga esnan mas serca di dje, compronde pakico e tabatin tanto empeño pa por a inverti na Boneiro. Aunke durante decadanan e isla aki a cay atras economicamente compara cu Aruba, riba hopi tereno Boneiro ta mucho mas adelanta. E empeño pa cuida medio ambiente y naturaleza ta bisto tur caminda. Un isla limpi, Boneiro ta sirbi hopi biaha pa ehempel mundial con un comunidad humilde a siña aprecia local e tin. Y apesar di e atencion mundial aki, Bonerianonan ta hopi selectivo cu e desaroyo economico cu nan kier. Den e sentido aki, 'Azul' ta cuadra cu perspectiva cu ta existi na Boneiro pa su desaroyo, un expansion economico cu unicamente mester sirbi pa hisa e calidad di bida na e isla, sin afecta su medio ambiente.

Tur miembro di e delegacion tabata emotivo pa mira un horizonte cu tabata asina parecido cu Aruba, cu excepcion cu e actividad humano tabata na un minimo.

Azul ta un proyecto dirigi na un mercado exclusivo di hendenan cu ta busca e luho di

un isla trankilo, pero cu kier tog tur e facilidadnan cu un hotel di luho ta ofrece. Aki ta drenta e wega e alianza cu Hilton Resorts cu lo desaroya un hotel di 144 camber y tambe ofrece su facilidadnan como servicio na esnan cu lo forma parti di e grupo selecto di 'Azul.'

Despues di e 'tour' inspirativo, e delegacion di Aruba a reuni hunto cu ehecutivonan di Gobierno di Boneiro, encabeza pa Consehero General Ramoncito Booi y otro invitadonan di e isla riba e sitio di construcion di 'Azul,' cu originalmente tabata e proyecto 'Plan Marina.' E proyecto aki nunca a keda realiza y e area a keda bandona pa 15 año, te ora cu Anthony Blok a mira su potencial pa un proyecto di clase.

Y e mesun clase ey a tipifica e ceremonia di 'prome piedra,' unda invitadonan tabata den un ambiente casual y relehante cu un toke special di elegancia. Frank Hoeverts di 'Targets & Results' compania encarga cu desaroyo di 'Azul' a dirigi e ceremonia cu a ilustra e proceso di construcion di e 78 casnan di luho, e posibilidad pa compra di tereno pa 15 villa y e hotel cu lo ta opera pa Hilton Resorts. Despues di e discurso-nan, unda entre otro Ramoncito Booi a gradici Anthony Blok pa su vision, e comerciante/desaroyado Arubiano, bisti den un Guayabera blanco (cu lo bira e uniform di 'Azul') a uni cu Antonio Diaz di Constructora Tecnica Filvousa riba un tractor, pa marca inicio oficial di e proyecto. E compania 'Constructora Tecnica Filvousa' ta encarga cu construcion di 'Azul,' mientras cu e financiamiento ta bou encargo di AIB Bank di Aruba. Pa banda di Hilton Resorts, Vice Presidente di e cadena prestigioso aki esta Gregory Rocket a ilustra e balor di 'Azul' pa su compania. Rocket ademas a expresa a bisa cu Hilton semper ta mira e islanan ABC como potencialnan grandi, ilustrando tambe nan interes den Aruba. Anthony di su banda tabata yen di entusiasmo pa anuncia na e invitadonan, cu mientras cu tabata haci e gestionnan pa e inicio di construcion di 'Azul' ya caba a logra bende e prome unidadnan di e proyecto. Un proyecto cu awor ta conta cu e sosten di Hilton Resort y mester bira modelo di luho, teniendo cuenta cu e balor ambiental unico di Boneiro.

